

# Yóm Tekang Kbuten

tehe kedlimun Dwata yó kem  
kentihen

**1** 1Bè yóm hol tekang  
kbuten, dlimun Dwata  
longit ne tonok. 2Yóm tonok, là  
kóen mtukul kmoen, ne laen se  
dù bang tonem taken lemwót bè  
yóm tey él nelem lelimun du,  
lel yóm tey kifu mget bè  
klamangen. Lemwót yóm Tulus  
Dwata tendo heklowong gu  
taken. 3Ne yó udél Dwata,  
monen, “Dlimunu layag.” Tahu

se, tódô sen-gengen se lemayag.  
4Ne tey hyu kton Dwata du yóm  
layag yó. Ominen yó semtólóng  
yóm layag bè yóm kifu. 5Yó  
boluyen du yóm layag, “Kdaw,”  
ne yóm kkifuhén, “Kifu.”

Timbow deng kmoen du yóm yó,  
ominen kifu ne bud mwas, tu se  
yóm hol tanay kdaw.

6,7Ne yó bud udél Dwata,  
monen, “Na sen-gawag dé yóm  
él anì wen lewu gónón nô.”  
Tahu se, tódô sgawag yóm él.  
Wen él nô fi laan, ne wen se

él nô fi ta. 8Yó boluy Dwata du yóm gónón sgawag, “Longit.” Timbow deng kmoen du yóm yó, ominen bud kifu ne bud mwas, tu se yóm gewuhen kdaw.

9Ne yó bud udél Dwata, monen, “Na gotu senbusung lu dé yó kem kdéen él nô laan longit anì gfan yóm fi laanen.” Tahu se, tódô kéng ulitem du. 10Yó boluyen yóm mékéng deng gfan, “Tonok,” ne yó boluyen yóm él deng sbusung, “Mohin.” Ne tey hyu kton Dwata du yóm deng nmoen yó. 11 Yó bud udél Dwata, monen, “Dlimunu anì tódô kentihen kay hulu tmowok gu lem tonok, kem bnes ne kem hulu ne kem koyu. Bè ket hulu

tmowok sal stólóng kbungu le ne eles wen lem le mò bud tmowok. Senged se bè koyu mungu, sal eles mung bè bungu le lem le mò bud gel tmowok. Ne bè yóm bud gel ktowok le, tódô sulit bè yóm sana kul gel kmò.” Tahu se, tódô kéng ulitem du. 12Tódô sut gu lem tonok kentihen tmowok talak tonok. Bè ket tmowok, sal stólóng lem le mò bud tmowok. Ne bè yóm bud ktowok le, tódô sulit bè yóm kul gel kmò. Ne tey hyu kton Dwata du yóm deng dlimunen yó. 13Timbow deng kmoen du yóm yó, ominen bud kifu ne bud mwas, tu se yóm getluhen kdaw.

14Omin Dwata bud mon du, “Dlimunu yó kem mnóng bè

longit mò semtólóng yóm kdaw  
 bè yóm kifu, ne mò gónô milô  
 yóm sendaw ne yóm sfalay ne  
 yóm bulón kmò hulu. 15 Mnóng  
 le gu bè longit anì hol lemayag  
 ete tonok.” Tahu se, tódô kéng  
 ulitem du. 16Wen yóm lewu  
 bong dlimun Dwata mò mnóng.  
 Dlimunen kdaw mò hlayagen ke  
 kemdaw, ne dlimunen bulón mò  
 hlayagen ke kifu. Ne homong  
 dlimunen snéen yó kem blotik.  
 17Suen bè longit yó kem mnóng  
 yó mò lemayag ete tonok, 18mò  
 mnóng kemdaw ne mò mnóng  
 kifu anì wen gónón stólóng yóm  
 layag bè yóm kifu. Ne tey hyu  
 kton Dwata du yóm deng  
 dlimunen yó. 19Timbow deng  
 kmoen du yóm yó, ominen bud  
 kifu ne bud mwas, tu se yóm  
 gfatén kdaw.

20Yó bud udél Dwata, monen,  
 “Dlimunu kentihen mowil lem él  
 mò nô bè yóm él deng bñusungu  
 anì hol wen nô lemen. Ne  
 dlimunu se kentihen gel mýóng  
 te kmawang anì hol wen  
 mýóng ta.” 21Tahu se, dlimun  
 Dwata yó kem klambaden utón  
 lembang nô lem mohin dalam se  
 yó kem kentihen mowil gel nô  
 lem él. Ne yó kem kentihen gel  
 mýóng te kmawang, gotu  
 dlimun Dwata lu. Ne kdê yó kem

dlimunen yó, bè yóm bud kból  
 le, tódô sulit bè yóm sana kul gel  
 kmò. Ne tey hyu kton Dwata du  
 yóm deng dlimunen yó. 22Ne  
 wen oluhen kul, monen mò kul,  
 “Hol ye mból anì hol wen nô  
 lem él ne nô lem mohin, ne anì  
 hol wen mýóng te kmawang.”  
 23Timbow deng kmoen du yóm  
 yó, ominen bud kifu ne bud  
 mwas, tu se yóm glimuhén  
 kdaw.

24Yó bud udél Dwata, monen,  
 “Dlimunu tódô lemwót gu bè  
 tonok yó kem kentihen kay ógóf  
 mò nô talak tonok, kem ógóf mò  
 tnomò ne kem ógóf nô lem bñes,  
 kewóten bè yó kem lebangen  
 kkólen bè yó kem leneken. Ne  
 kdê yó kem dlimunu yó, bè yóm  
 bud kból le, tódô sulit bè yóm  
 sana kul gel kmò.” Ne tahu se,  
 tódô kéng ulitem du. 25Duhen  
 yó, deng gotu dlimun Dwata  
 yóm kdê le, ne bè yóm bud kból  
 le, tódô sulit bè yóm sana kul  
 kmò. Ne tey hyu kton Dwata kul.

26Ne yó bud udél Dwata,  
 monen, “Mò te tau dé,<sup>a</sup> heskél te  
 lu bélê te mò mkem yó kem  
 kentihen mowil lem él, ne yó  
 kem kentihen mýóng te  
 kmawang, ne yó kem kentihen  
 kay ógóf, kem ógóf mò tnomò ne  
 kem ógóf nô lem bñes, kewóten

<sup>a</sup> 1:26 Yóm udél Dwata bè bérs 26 yó, yóm monen, “Mò te tau dé,” gbak ebélê le tlu  
 le yóm monen yó koni: Dwata, ne yóm Ngaen, ne yóm Tulusen.

bè yó kem lebangen kkólen bè yó kem leneken.” 27Tahu se, nmò Dwata tau ne heskélen lu béléen. Nmoen logi ne nmoen libun. 28Ne wen oluhen kul, monen, “Hol ye mból anì tódô tfeng klamangen benwu yó kem angat lugod ye mò kmamal du. Hkemu kuy yó kem kentihen mowil lem él, ne yó kem kentihen gel móyóng te kmawang, ne yó kem kentihen ógóf nô talak tonok. 29Blayu kuy yó kem kentihen hulu tmowok te tonok ne yó kem kentihen bungu koyu mò ken ye. 30Okóm bè yó kem ógóf te tonok ne yó kem onuk móyóng te kmawang, deng tey dê kay bnes dlimunu bélê le mò kul ken.” Ne tahu se, kéng ulitem du. 31Omin Dwata bud temngel du yó kem kdê deng dlimunen yó, ne tey bong hyu ktonen kul. Timbow deng kmoen du yóm yó, ominen bud kifu ne bud mwas, tu se yóm gnemen kdaw.

**2** 1Duhén yó, deng gotu deng ne kedlimun Dwata du yóm longit ne yóm tonok ne yó kem kdéen ton ta le. 2Bè yóm ghituhen kdaw, là buden mò nmò Dwata, deng gotu deng ne kedlimunen du yóm kentihen. 3Ne wen oluhen du yóm ghituhen kdaw yó, htólóngen mò kun, abay se bè yóm kdaw yó, là

buden mò nmò, deng gotu deng ne kedlimunen du yóm kentihen. 4Yó se tehe kmò kedlimun Dwata du yóm longit ne yóm tonok ne yó kem kdéen ton ta le.

### yóm hungul koyu lamang boluyen Idin

Bè yóm tehe kedlimun yóm sana Dwata hol gónô mogot du yóm longit ne yóm tonok, 5laen kô dù hulu tonem ta yóm tonok, ne laen se dù lem hulu lemsob tahen, abay se là deng hkulón Dwata du he, lenen yó he laen se dù tau mò hulu. 6Okóm balù yóm là deng kehkulón Dwata du, wen él tembul gu lem tonok mò hméfê du.

7Bè yóm tehe kmò Dwata tau, wen tonok nwahen, ne nifilen, henbalingen tau. Ominen myuf lem ilungen yóm nawa mò hlowil du, ne tódô mnawa yóm tau nifilen yó, ne sen-gengen se mowil.

8Ne wen hungul koyu nmò Dwata bè yóm benwu boluyen Idin bè fi dmata kdaw, ne bè yó gónón hemsù du yóm tau deng nifilen. 9Tódô kentihen koyu alì tilob mton du, gotu htowok Dwata bè yó, hlò kem koyu tilob kbungu le. Bè hol gónón sóól yóm hungul nmoen yó, wen sotu koyu mteg bè yó ke gken tau bunguhen, tódô hlós mowil. Ne wen bud sotu koyu mteg bè yó

ke gken tau bunguhen, tngónen yóm hyu ne tngónen snéen yóm sidek.

10Bè yóm hungul Idin yó, wen él bong mlel gu lemen mò hméfê du. Yóm él yó, fat gónón mesgólól bè senbwak yóm hungul. 11Yóm tanay lenen, boluyen Pisun, mlel etu gu lem yóm benwu boluyen Habila. (12Bè yóm benwu yó gónón nô yóm blówón laen kô dù bolen, ne yóm sotu kay litok koyu alì tilob boohen, ne yó kem botu tilob alì mebtès.) 13Ne yóm gewu lel yóm él yó, boluyen Gihun, mlel etu gu lem yóm benwu boluyen Kus. 14Ne yóm getluhen, boluyen Tigris, mlel etu fi dmata kdaw yóm benwu Asirya. Ne yóm gfat lenen, boluyen Yufratis.

15Ne yó nmò Dwata, suen bè yóm hungul Idin yó yóm tau nifilen mò mò hulu bè yó ne mò mentey du. 16Yó mon Dwata bè yóm tau nifilen yó, monen, “Gbekem mken du nô kihu bungu koyu bè nim hungul ni. 17Tek són yóm koyu mteg talaken, ke gkenem bunguhen, angat tngónem yóm hyu, ne angat tngónem snéen yóm sidek. Hol béem ken bunguhen, abay se ke gkenem, angati matay bè yóm kdaw kkenem du.”

18Yó bud mon Dwata, monen, “Là hyuhen béléen nim tau nifilu

ni ke tek sotuhen. Yó hyu, moe béléen dumuhen seklóón mò tóbóng lówóhen.” 19Tahu se, gotu nwit Dwata ebè yóm tau nifilen yó yó kem kentihen deng tehe dlimunen lemwót bè tonok, yó kem kentihen ógóf nô te tonok ne kentihen onuk móyóng te kmawang. Ne hmoen du boluy le. Ne yó se buten yóm kwen kul mdengen boluy yó kem kdê le. 20Tahu se, gotu nmò yóm tau nifil Dwata yó boluy yó kem kentihen onuk móyóng te kmawang ne kentihen ógóf nô te tonok. Okóm balù sotu bélê le ke seklóón béléen mò tóbóng lówóhen.

21Omin Dwata henga htungô yóm tau yó, ne bè yóm igoen lemnga, tódô dilot Dwata béléen sotu tiol lohoken, ne kendel hekdimolen yóm ungeden.

22Tódô henbaling Dwata libun yóm tiol lohoken yó koni, ominen mit du ebè yóm logi.

23Ne yó mon yóm logi yó, monen,

“Ni dii hol dou dumu seklóón.

Dou tiol yóm kun tiol,

Ne dou unged se yóm kun unged.

Boluyu du libun abay se bè logi gónón lemwót.”

24Yó gónóm mon, yóm tau ke myehen, gtagaken maen ne yéen, ne tódô le setlomin yóm

kun tuha libun, baling le ssothu yóm lewu le.

25Bè yóm kdaw yó, tódô mógów hlówó yóm logi ne yóm libun yó, okóm là kô le myak du.

yóm là kimón tau

**3** 1Bè kdê yó kem gel nô lem bnes deng dlimun yóm sana Dwata hol gónô mogot, ulal yóm ali hulung smukat bélê le. Ne snólók yóm ulal yóm libun, monen, “Tahu kô deng mon Dwata mò kuy hol bê ye abay ken yó kem buntu koyu bè nim hungul ni?”

2Ne yó balaen du yóm libun, monen, “Gbek me mken du nô kihu kay buntu koyu bè nim hungul ni, 3tek sôn yóm koyu mteg bè gónón sóól, là hken Dwata du kum bunguhen, balù kdù me du, là gmò me du. Ke yó nmò me, matay me.”

4Ne bud mon yóm ulal bè yóm libun, “Bógem, là kóen tahu yó, là kô ye nee matay. 5Yó gónô Dwata mngali du kuy yóm yó, abay se tngónen ke ken ye, angat ye mkél béléen, tngón ye yóm hyu, ne tngón ye se yóm sidek.”

6Timbow henklol hnunu yóm libun yóm koyu yó, tey minggel ktonen du, ne hendemen dô hyu mken du bunguhen, lelen hemdem du tey hyu ke baling temngón. Yó gónón wen nwahen bè yó kem bunguhen, ne kenen.

Ominen wen blayen ke tuha logihen, ne kenen se kun. 7Uni le mken du, tódô wen tngón le, ne ton le tódô le hlówó. Yó ne sotu kun ma doun koyu fig, tenbé le mò dowin le.

8Nee mýón kifu bè yó, tódô gungol le yóm Dwata hol gónô mogot mógów talak yóm hungul, ne mom yó nmò le, mom henbnos le Dwata lem blóng yó kem koyu. 9Okóm tnaba Dwata yóm logi, monen, “Gónóm nô de?”

10Yó balaen du yóm logi yó, monen, “Gungolu u se yóm kkólem bè ni, okóm likoe, henbnosu u, abay se tódóe hlówó.”

11Ne yó snólók Dwata béléen, monen, “Tau du se tmlón du kóm yóm tódô kehlówóhem? Deng kenem kô yóm buntu koyu ngaliyu kuy?”

12Ne yó balaen du yóm logi, monen, “Yó sem libun nmoem mò dumuhu bemlay du do, ne kenu.”

13Ne snólók Dwata yóm libun, monen mò du, “Moen du ke nmoem nim ni?”

Ne yó balaen du yóm libun, monen, “Abay kenu dou, yó sem ulal fen smukat dou.”

ktafak Dwata kul le Adam ne Ib

14Ne yó mon Dwata ebè yóm ulal, monen, “Bè nim nmoem ni,

wen tafaku kóm. Bè kdê yó kem ógóf talak tonok, tek són uu gembô du nim tafak ni. Lenwóten bè nim kdaw ni efet kól bè hol sónen, sónmoem mulu se kóm, ne sónmoem mken kfung bè yóm klawihem mowil. 15Hlós senfohonu yu yóm libun. Yóm kun lugod ne yóm kóm lugod, angat sónmò le tendo sfohon. Okóm wen bè kun lugod yóm libun angat lenunahan kuluhem. Ne yóm kóm lugod, fen nékéten bè tekeden.”

16Ne yó bud mon Dwata ebè yóm libun, monen, “Angat tennuu yóm ksidek kegnómem du bè yóm keblututem, ne angat hol hdesu yóm ksut blututem. Baluen se ke lómón yó kmoen, là kóen skó yóm óyô lówóhem du yóm tuha logihem, ne du se angat kuluhem.”

17Ne yó udél Dwata ebè yóm logi, monen, “Deng nimónem udél tuha libunem, ne deng kenem yóm bungu koyu ngaliyu kuy. Lemwót bè nim nmoem ni, mung golu béléem klamangen tonok. Bè yóm klawihem mowil, ke là nahi hol mò nmò, là kô wen gónóm ma mò ken ye. 18 Tendo senflós mget kluonen yóm tonok, ne hlós tmowok tahen yóm tey bnes semnual. Baluen ke lómón ni mò kmoen, wen gel huluhem mò ken ye. 19Ke là nam na ninget mò hulu, là kói

gemtob ken. Ni se mò kmoen béléem efet bud kbalingem tonok, abay se bè tonok tehe gónóm gu lemwót. Nifilu u lemwót gu bè tonok, ne angati bud baling tonok.”

20Ne yó boluy Adam du yóm libun yehenen, Ib, abay se du yê yó kem kdéen tau mowil te tonok. 21Ne wen nes lemwót bè kulit ógóf nmò Dwata bè Adam lewu le Ib mò nes le.

### kehdo Dwata ke Adam ne Ib bè yóm hungul Idin

22Ne yó bud mon yóm Dwata hol gónô mogot, monen, “Ngem yóm tau, deng baling mkél kut, deng tngónen yóm hyu, ne deng tngónen snéen yóm sidek. Hol là hyuhen ke ma bè yóm koyu hlowil tau, abay se ke kenen, tódô hlós mowil.” 23Yó gónóm mon, tódô hdo Dwata le Adam bè yóm hungul Idin anì nbuten mò nmò ta yóm tonok tehe gónón gu lemwót. 24Ne wen kem hógówen gu bè longit hunungen bè fi dmata kdaw yóm hungul yó. Wen tey sudeng sù Dwata bè yó snéen, tendo eles sedlu dilóf bè baken ne tendo hilóy lowi anì laen dù tau gehloni ebè yóm koyu hlowil tau.

**Yóm Tekang Kbuten  
ne  
Yóm Kehewà Le Gu Bè Idyip**

ISBN 971-826-015-3

© The Bible League, 2000